

22
3353

正法住世挽救末劫唯一法寶
爲便修持後附詳註

須摩提經

以子夏
名



須摩提經

大唐三藏法師菩提流支奉詔譯

如是我聞、一時佛在王舍城、耆闍崛山中、與比丘衆千二百五十人、菩薩摩訶薩十千人俱。時王舍城有長者女、名曰妙慧、年始八歲、面貌端正、容色姝好、諸相具足、見者歡喜。曾於過去、無量諸佛、親承供養、種諸善根。時彼女人、詣如來所、頂禮佛足、右繞三匝、而說偈言。

無上等正覺 爲世大明燈 菩薩之所行 唯願聽我問
佛告妙慧、今恣汝問、當爲解說、令斷疑網。爾時妙慧、卽於佛前 興偈問曰。

云何得端正	大富尊貴身	復以何因緣	眷屬難沮壞	云何見己身
而受於化生	千葉蓮華上	面奉諸世尊	云何能證得	自在勝神通
徧往無量刹	禮敬於諸佛	云何得無怨	所言人信受	淨除於法障
永離諸魔業	云何命終時	得見於諸佛	聞說清淨法	不受於苦惱

大悲無上尊 唯願爲我說

爾時佛告妙慧童女言、善哉善哉、善能問此深妙之義。諦聽諦聽、善思念之、當爲汝說、妙慧白言、唯然世尊、願樂欲聞。佛言妙慧、菩薩成就四法、受端正身。何等爲四、一者於惡友所不起瞋心。二者住於大慈。三者深樂正法。四者造佛形像。爾時世尊而說偈言。

瞋壞善根勿增長 慈心樂法造佛形 當獲具相莊嚴身 一切衆生常樂見
復次妙慧、菩薩成就四法、得富貴身。何等爲四、一者應時行施。二者無輕慢心。三者歡喜而與。四者不希果報。爾時世尊而說偈言。

應時行施無輕慢 歡喜而與不希求 能於此業常勤修 所生當獲大財位
復次妙慧、菩薩成就四法、得眷屬不壞。何等爲四、一者善能棄捨離間之語。二者邪見衆生令住正見。三者正法將滅護令久住。四者教諸有情趣佛菩提。爾時世尊而說偈言。

捨離間言及邪見 正法將滅能護持 安住衆生大菩提 當成不壞諸眷屬
復次妙慧、菩薩成就四法、當於佛前、得受化生、處蓮華座。何等爲

四、一者捧諸華果及細末香、散於如來及諸塔廟。二者終不於他妄加損害。三者造如來像安處蓮華。四者於佛菩薩深生淨信。爾時世尊而說偈言。

華香散佛及塔廟 不害於他并造像 於大菩提深信解 得處蓮華生佛前
復次妙慧、菩薩成就四法、從一佛土至一佛土。何等爲四、一者見他修善不爲障礙。二者他說法時未嘗留礙。三者燃燈供養如來之塔。四者於諸禪定常勤修習。爾時世尊、而說偈言。

見人修善說正法 不生誹謗加留難 如來塔廟施燈明 修習諸禪遊佛刹
復次妙慧、菩薩成就四法、處世無怨。何等爲四、一者以無詔心親近善友。二者於他勝法無嫉妬心。三者他獲名譽心常歡喜。四者於菩薩行無輕毀心。爾時世尊、而說偈言。

不以詔諛親善友 於人深法無妬心 他獲名譽常歡喜 不謗菩薩得無怨
復次妙慧、菩薩成就四法、所言人信。何等爲四、一者發言修行常使相應。二者於善友所不覆諸惡。三者於所聞法不求過失。四者於說法者不

生惡心。爾時世尊而說偈言。

發言修行常相應 己惡不藏於善友 聞經不求人法過 所言一切皆信受
復次妙慧、菩薩成就四法、能離法障、速得清淨。何等爲四、一者以深意樂攝三律儀。二者聞甚深經不生誹謗。三者見新發意菩薩生一切智心。四者於諸有情大慈平等。爾時世尊、而說偈言。

以深意樂攝律儀 聞甚深經能信解 敬初發心如佛想 慈心普洽障消除
復次妙慧、菩薩成就四法、能離諸魔。何等爲四、一者了知法性平等。二者發起精進。三者常勤念佛。四者一切善根皆悉迴向。爾時世尊、而說偈言。

能知諸法平等性 常起精進念如來 迴向一切諸善根 衆魔不能得其便
復次妙慧、菩薩成就四法、臨命終時、諸佛現前。何等爲四、一者他有所求施令滿足。二者於諸善法深生信解。三者於諸菩薩施莊嚴具。四者於三寶所勤修供養。爾時世尊、而說偈言。

他有所求令滿足 信解深法捨嚴具 三寶福田勤供養 臨命終時佛現前

爾時妙慧童女、聞佛說已。白言世尊、如佛所說菩薩諸行、我當奉行。世尊、若我於是四十行中、闕於一行而不修者、則違佛教、欺誑如來。爾時尊者大目犍連、告妙慧言、菩薩之行、甚難可行。汝今發斯殊勝大願、豈於是願得自在耶。爾時妙慧白言、尊者、若我弘願真實不虛、能令諸行得圓滿者、願此三千大千世界六種震動。是時妙慧重白目連、以我如是真實言故、於未來世當得成佛、亦如今日釋迦如來。於我國中、無有魔事、及以惡趣、女人之名。若我此言、非虛妄者、令此大眾、身皆金色。說是語已、衆皆金色。爾時尊者大目犍連、卽從坐起、偏袒右肩、頂禮佛足。白言世尊、我今先禮初發心菩薩、及諸菩薩摩訶薩衆。爾時文殊師利法王子、告妙慧言、汝住何法、發斯誠願。妙慧答言、文殊師利、非所問也。何以故、於法界中、無所住故。又問、云何名爲菩提。答曰、無分別法是名菩提。又問、云何名爲菩薩。答曰、一切諸法等虛空相是名菩薩。又問、云何名爲菩提之行。答曰、猶如陽燄谷響之行、是菩提行。又問、依何密意作如是說。答曰、我於是中、不見少法。

密非密者。又問、若如是者、一切凡夫、應卽菩提。答曰、汝謂菩提異凡夫耶。莫作是見。何以故、此等皆同一法界相、非取非捨、無成壞故。又問、於此義中、能解了者、其數幾何。答曰、如若干幻化、心、心所量。若干幻化衆生、能了斯義。文殊師利言、幻化本無、何有如是、心、心所法。答曰、法界亦爾、非有非無、乃至如來、亦復如是。爾時文殊師利白佛言、世尊、今此妙慧、甚爲希有。乃能成就如是法忍。佛言、如是如是、誠如所言。然此童女、已於過去發菩提心。經三十劫、我乃發趣無上菩提。彼亦令汝住無生忍。爾時文殊師利、卽從坐起、爲其作禮。白妙慧言、我於往昔、無量劫前、已曾供養。不謂今者還得親近。妙慧告言、文殊師利、汝今莫起如是分別。何以故、以無分別得無生忍故。又問妙慧、汝今猶不轉女身耶。妙慧答言、女人之相、了不可得、今何所轉。文殊師利、我當爲汝除斷疑惑。由我如是真實語故、於當來世、得阿耨多羅三藐三菩提時、於我法中、諸比丘輩、聞名善來、出家入道。我國土中、所有衆生、悉皆金色。服用資具、如第六

天。飲食豐饒、隨念而至。無有魔事、及諸惡趣。亦復無有女人之名。有七寶林、上羅寶網。七寶蓮華、覆以寶帳。如文殊師利所成淨刹。裝校嚴飾、等無有異。若我此言、非虛妄者、令此大衆、身皆金色。我之女身變成男子。如三十歲知法比丘。說此語時、此諸大衆、身皆金色。妙慧菩薩、轉女成男。如三十歲知法比丘。是時地居天衆、展轉讚言、大哉大哉、妙慧菩薩摩訶薩、能於來世得菩提時、嚴持佛刹、功德如是。爾時佛告文殊師利、此妙慧菩薩於當來世、成等正覺、號殊勝功德寶藏如來、出現於世。佛說此經時、三十俱胝衆生、於阿耨多羅三藐三菩提、住不退轉。八十俱胝衆生、遠塵離垢、得法眼淨。八千衆生、皆獲智證。五千比丘、行菩薩乘、心欲退轉。因見妙慧菩薩意樂善根、威德殊勝故。各各脫其身上所著上服、以施如來。如是施已、發弘誓言、我等以此善根、決定願成阿耨多羅三藐三菩提。彼諸善男子等、以此善根、迴向無上菩提故、超九十劫生死之苦、不退轉於阿耨多羅三藐三菩提。爾時世尊、卽記之曰。汝等於當來世、過千劫後、於無垢光明劫

中、陽燄世界、難忍佛刹、於一劫中、相次成佛。皆同一字、號辯才莊嚴如來出現於世。文殊師利、如是法門、有大威德。能令菩薩摩訶薩及聲聞乘者、獲大利益。文殊師利、或有善男子善女人、爲求菩提無方便善巧、行六波羅蜜、足滿千劫。若復有人、經半月時、一書寫讀誦此經、所獲福聚、比前功德、百分千分、百千俱胝、乃至算數譬喻所不能及。是故文殊師利、如是微妙法門、卽諸菩薩契經之本。我今付囑於汝。汝當來世、受持讀誦爲人解說。譬如轉輪聖王、出現於世。所有七寶、皆現在前。王滅之後、寶皆隱沒。如是微妙法門、流行於世。卽諸如來七菩提分等法明不滅。若不流行、正法當滅。是故、文殊師利、若善男子善女人等、爲求菩提、應當發起精進、書寫此經、受持讀誦、爲人演說。此是我教。切勿於後世、生悔恨心。佛說此經已、妙慧菩薩、文殊師利菩薩、及諸大衆。天人阿修羅、乾闥婆等。聞佛所說、皆大歡喜、信受奉行。

須摩提經

須摩提經淺釋

釋演本

佛經立名，不外乎人法喻三者。此經人法二者合名。「須摩提」人名，係特別名詞。「經」者，萬劫常新，佛口宣說之法義，係通常之名詞。距今千二百年前，精通經律論三藏之法師菩提流支，依漢文習慣，譯須摩提爲妙慧。令人一望而知此菩薩之聖德，堪爲人天導師。一佛出世，千佛擁護。此菩薩乃千佛中之一位。爲妙引一切有緣，同出生死苦海，同開正法眼，同成菩提覺道之故。如觀世音菩薩化度有緣，妙合機宜，於三十二種神通變化中，權現童女身。於釋迦世尊靈山法會中，顯大威德，運大神通，出大辯才，說究竟法，使三千萬衆不退轉於無上菩提道。八千萬衆得法眼淨。八千新佛安住不生不滅無量億佛之不動道場。五千退心比丘咸發無上菩提道心，立即超出九十一劫生死之苦，究竟成佛有分。此菩薩在世尊未發無上道心以前三十劫，早已發其無上道心。又爲文殊菩薩之導師。爲其暢說無生妙法，令其安住無上覺道中。此經一切已出家未出家之佛弟子。求捷出生死苦海。永免六道輪迴之菩薩聖衆。以及中外一切留心佛道，發願修習，力求成就大成就之一切開士。皆當捐除污雜俗念。精勤修省，培養淨德，大放慈光。掃除一切人禍天災，立使萬惡叢生之苦惱世界，成佛淨土。經文僅二千六百五十六字，可以片時畢誦。經義除幾處專門名詞外，明白暢曉。概括全部大藏經中所說一切世間出世間法精義。凡有緣得見得聞者。咸得無量福。於改造自他不幸之運命。以及連帶改造現在未來時代中全人類不幸之命運。有絕大關係在內。此經掃除人間種種患苦。有不可思議之偉

力。萬不可以俗眼輕視，俗腸妄揣，而招不可救藥之謗。佛謗法謗聖之重罪，與後來無涯之痛苦。〔王舍城〕中印度八大城之一。環城有五山，佛恆常說法化度人天大衆之靈鷲山居第一。〔耆闍崛〕闍音蛇，巴利音，一作伊沙堀，同音異字，漢文譯爲靈鷲山，鷲鷹也，肉食之兇鳥。山有雙峯，多鷹集其中，樂聞法要，斷除血食惡習，而成聖鳥，咸得拔度生天。鷲山簡稱靈山，或謂山頭遠望如鷲頭，故以鷲山著稱。佛常在此說法，化度一切聖衆。與舍衛城外之祇園精舍齊名，大藏經十分之八九多在此二處宣演。〔比丘〕出家男衆。〔千二百五十人〕爲常隨佛學之常隨衆，亦稱聲聞衆，都已證不生不滅聖道之阿羅漢。能自了脫，未修了脫一切有情之無上覺道，名爲小乘聖衆。〔菩薩摩訶薩〕摩訶大也。如菩薩四弘誓願中所云：衆生無邊誓願度。煩惱無盡誓願斷。法門無量誓願學。佛道無上誓願成。菩薩之學，深廣逾洋海。詳載大乘經論中，未易撮舉。〔長者〕世俗稱長者爲居士一類，非也。居士即古人所稱之處士。今人稱一切學佛道者曰居士。居士有二。一在家修道，以道淑身，爲多士範，名曰居士。二廣積資財，居財崇德，樂修施福，名曰居士。長者心平，性直。語實，行敦。齒邁，財盈者之通稱。備十德之高賢，名大長者。一姓貴，二位高，三大富，四威猛，五智深，六年者，七行淨，八禮備，九上歎，十下歸。又佛從三世真如實際中生，功成道著，十號無極。法財萬德，悉皆具滿，名出世佛大長者，亦名觀心長者。〔妹〕音樞，女子有幽嫺貞靜。慈柔和順之美德者。〔善根〕即佛經所稱菩薩種性。固不可拔謂之根。能修衆善，能結妙果，謂之根。不貪，不瞋，不癡，名三善根。因一切善行從此產生及增長，故以根名。〔詣〕音擬，懷抱無量美意，並具智慧辯才而來，

曰詣。〔右繞〕表示精進不退義。傾誠愛戴義。右繞三匝以表身口意三業傾誠愛戴。〔長跪〕右膝著地，左足跟站起，如胡人行禮敬然，故亦名胡跪。〔無上〕言佛德至尊，佛道至高，無有出其上者。世俗以天爲至尊，佛爲天人之師，又名天中之天。簡稱曰無上。〔等正覺〕衆生在迷，分彼分此，分貴分賤，分親分疏，起種種差別見，作惡造罪。與佛德相反。十方諸佛，無我見人見衆生見壽者見。等視一切衆生爲一體。一切衆生，等具佛性。未來罪畢，功行圓滿之日，皆當成佛。十方世界，無量恆河沙數諸佛，胸中皆佩一卍字之唯一法印。一——豎表示過現未三世不可分割。一畫代表一圈，表示十方成一渾圓。同認三世十方爲一整個，所以同成無上正等覺。〔大明燈〕衆生在迷，一晝夜八萬六千四百秒中，常常亂念紛飛，失却本明。萬劫，千生，如坐暗室，不見一線光明。諸佛無念，清淨寂定，光徹十方。所宣法義，令衆破惑。導人出罪，復明破黑，故云普照世間之大明燈。〔聽〕慈悲允許義。表示至敬，非慈許不敢發問也。〔恣〕可任意發言，不必拘束也。〔疑網〕網喻如紗籠之掩却真相然。疑惑之遮却真理亦如之。〔偈〕音憩。佛說法時，於長行法義說畢以後。必申說若干四句偈，反復說明之，以便修學之士之唱念及憶持。〔端正〕福相也。〔沮壞〕沮音直，阻止。壞，破壞。眷屬受旁人離間之辭而起嫌怨或衝突。此乃夙不善業中，離間他人骨肉之罪報。世尊對症發藥，以棄捨離間之語普救之。〔法障〕一切世事總名曰法，不消具舉。障者，罪障，亦名業障。〔魔〕魔有障礙破壞擾亂奪命等惡狀。凡能斷人慧命者曰魔。通常稱爲四魔者，一煩惱魔，貪等煩惱能害身心，爲內魔。二五陰魔，色，及受想行識，五蘊，能生種種苦惱，亦爲內魔。五蘊亦作五陰，八苦之第八，爲五

陰盛苦。盛者如空器中滿裝物件義。有形可見之色蘊。及並無形色之領受蘊，追想蘊，行動蘊，識別蘊。此五陰中衆苦裝滿。衆生迷昧顛倒，認苦爲樂。有智慧者，聞此當頭棒喝之一法語，立即可以猛醒回頭，從千年黑室中躍出矣。三死魔，能斷人命根。四天魔，欲界第六天名魔天。行人發大心，勇猛精進時，震動魔宮，招魔天之忌，作種種惡法，破壞人之善事。惟真能發無上菩提道心者，天魔不能破壞之，而被道心菩薩所調伏，捨邪而歸正。〔諦聽〕佛說真實不虛之理曰諦。宜淨心善聽，受福甚大。〔唯然〕唯音委，應聲甚速，毫無疑義曰唯。然，乃肯定之義，猶今人善聽，迅速應聲曰是，甚是。〔願樂〕願，志願。心云所向謂之志，心志中願求之事，簡稱曰願。樂，音效。深心歡喜而愛聽也。

世尊首答妙慧菩薩如何能得端正身之四法〔一於惡友所不起瞋心〕佛及菩薩，妙相端嚴，全從多生忍辱中來。人間凡缺乏好相之輩，全從多生易起憤怒怨恨心之瞋習中來。凡俗之人，易起誤會，對於善人善行，尙起惡心。犯罪甚多。若有真正道心行人，不但對於善人善行，生歡喜心，出讚歎語。即使遇到惡友，亦不起分毫計較之心。非常原諒。在彼心中眼中，世間無一不可化之人。惟恨自己功修不到，不能感化。自責自警之不暇，尙何敢動其瞋恨之念，增加無量罪過。世尊大悲大慈，開示出此一妙法輪，爲處羣處世之唯一妙方法。如孔子所說之誠意，正心，齊家，治國，平天下。卽此於惡友所不起瞋心之一法語，已所向有成，受用不盡了。昔人言治天下只消半部論語，也是深知灼見之辭。倘彼古人有緣見此須摩提經，不知如何欽戴也。〔二住於大慈〕運廣大慈心，拔一切衆生之苦，爲佛菩薩之大慈。觀世音菩薩，住於大慈三

昧中，循徧一切處衆生籲救聲，放大慈光，徧應而同時拔濟之。地藏王菩薩，住於大慈三昧中，救拔地獄衆生，披宏誓鎧，轉大願輪，云我不入地獄，誰入地獄。我不度地獄衆生，誰度地獄衆生。地獄不空，誓不成佛。住於大慈，是又佛菩薩妙相莊嚴之一因。〔三深樂正法〕正法，真正之大道理。正法能燭照生死苦海中一切衆生之昏暗，名正法炬。如來所說一切之教誡，曰正法輪。諸佛如來，救治一切衆生八萬四千煩惱惑業之重病，如鑰投鎖一般。給與八萬四千妙法，恰如其分，對症救治之法藥。法藥中所宣說之義理，佛以四種智慧，四種無礙辯才。橫說豎說，深說淺說。詳說略說。顯說密說。善說如說。熾然說。無文字語言處無相說。一切凡外所不能說。名曰正法。以慈濟一切爲教體。以究竟真實爲理體。以覺行圓滿爲果體。具足教理行果四者爲正法體。善學諸仁賢，深心愛樂，無量積誠，呼籲寢饋於正法，具此希有莊嚴心，自成希有莊嚴相。〔四造佛形像〕佛爲覺者，像乃模倣。造像福利自他，有自覺覺他之深意存在。人在罪海，受生死苦。因造衆罪，故受諸苦，失却妙相，而現醜狀。能行覺道，心地改善。相隨心變，感受好相，理甚明顯。世尊升三十三天，爲報母恩，說法九十天，助母摩耶夫人出三界，成正覺。下界渴仰如來，一切聖衆，咸感苦惱。有優填王，憶念如來。招募名匠造佛形像。精誠通感，毘摩羯天，化一工匠，代爲造像。於四月八日開始興作。劈栴檀香，聲震三十三天。天人問故。佛言：優填王憶佛心切，造佛形像，以便瞻禮，已植當來成佛之因。佛告諸天衆，昔有曾造佛像者，皆於過去已得解脫。在天衆中，尙復無有，何況餘處。唯有四王天毗沙門子，「毗沙門」一名多聞天，多聞天在護世四王天之北門，鎮攝一切鬼神，「那履

沙婆，曾於往昔，造菩薩像，以斯福故，後得爲王，名頻婆娑羅。復因見佛聞法。今得生天，有大勢力，永離惡道。優樓頻螺迦葉，伽耶迦葉，那提迦葉，並曾於往世修故佛堂。由此因緣，永得解脫。憍梵波提，昔作牛身，迫求水草，右繞精舍，食諸草竹。因見尊像，發歡喜心。乘此福力，今成羅漢而得解脫。尸毗羅，曾持寶蓋，供養佛像。阿菟樓駄，燃一支燈，亦以供養。輸鞞那，曾掃佛堂。阿婆摩那於佛像前，燃燈施明。難陀比丘，愛重尊像，香水洗沐。有如是等無量諸阿羅漢，皆昔曾於佛像之所，薄申供養。乃至極下如那伽波羅，於像座前，以少許黃丹，畫一像身，而爲供養。由此福故，皆永離苦，而得解脫。「以上摘錄造像功德經」。

次答妙慧如何得大富尊貴身之四法

〔一應時行施〕布施種福，喻如天施地生。及時下雨，稱爲甘霖。及時放晴，萬類欣喜。行施識時，不後不先。施量相宜，不過不歉。種斯善因，最爲殊勝。〔二無輕慢心〕法法平等，無有高下。施者受者，視同一體。內無分別之心，外無傲慢之氣。至誠至敬，對諸來者，禮如上賓。內不見有己。外不見有他。中不見所施之物。是爲三輪體空。可名上施。所種勝福，難可測量。〔三歡喜而與〕人間衆苦，全由不均不平中生。有而善散，不均斯均。缺而給足，不平乃平。既平且均，咸得安樂。儒家明此中關係，而云財聚則羣情散，財散則衆心聚。佛道最爲徹底，而云有者爲衆苦之聚，捨者爲萬善之先。明了此理，自能歡喜而與。解人患苦，不但結人間歡喜之緣，並能得萬靈歡讚，後福無量。〔四不希望報〕昔人云種瓜得瓜種豆得豆，乃勉勵

尋常人之言。凡施己所有，補他所缺，是人類分所應爲之事。若起心動念，希求果報而行施，是爲凡人汙染心。能心空無物，無所希求而行施，是爲達人清淨心。汙染行施，難免沉淪之苦。清淨行施，已種超脫之因。世尊大慈大悲，爲現在未來一切求富貴者，善爲開示，令盡苦源。慈濟羣生之恩澤，至深至廣，難可思議矣。

三答妙慧如何得眷屬不壞之四法

〔一善能棄捨離間之語〕積人而成家，積家而成國，積國而成世界。眷屬云者。乃一集團一體系之謂。家國及世界，可以比類而觀。欲求一集團多集團，一體系多體系，一解決一切解決，了無沮壞之苦。如此福利，不能幸致。眷屬間有沮壞之相，乃一種至苦惱之裂痕也。欲求去此，當在心地中施功。如來應病給藥，以善能棄捨離間之語，作根本解決之唯一妙法。由行此妙行，不觸人鬼之忌。不傷天地之和。既能種此善因，捷得收此福果。〔二邪見衆生令住正見〕衆生於未生前本來無我。氣盡後究竟無我。以罪福因緣故，暫時幻現。剎那變滅，有誰站脚得住。於本來無我，究竟無我中，妄認有我。妄認有我，便起邪見。邪見既起，妬忌心生。離間之語，由彼口出。沮壞人間，一切好事。以故修行菩薩道者，首先制止自己之作惡犯罪行爲，於棄捨離間惡法之外，再進一步，開化邪見衆生，令住正見，而修聖道。〔三正法將滅護令久住〕末世衆生，難聞正法。邪見橫生，居心毒辣。妬人成功，壞人美事。世多如是作惡造罪之人，暗無天日。皆由不聞正法，不修聖行，誤入邪途所致。是以菩薩於開化邪見衆生令住

正見之外，更進一步，護持諸佛如來所宣正法。所謂法輪大轉，佛日高懸。一時正法大昌，在位皆賢明。羣邪自斂跡矣。〔四教諸有情趣佛菩提〕一佛出生，化度無量。一切衆生，皆有佛性。彼等不聞正法，誤入邪途。衆生造罪，責在先覺。先覺於念念中能盡責，無難使一一造罪衆生，盡得出罪機會。邪見之人令住正見，以菩薩能盡責故。正法將滅護令久住，亦以菩薩能盡責故。事在人爲。諸佛如來，因於衆生而起大悲。因於大悲，發菩提心。因菩提心，成等正覺。菩薩既克盡厥責，令邪見人住於正見。正法將滅，護令久住已。進而不已，令一切有情，悉發無上道心。清康熙間，有一菩薩居士周安士，每過神廟，必入內向神像勸發菩提心。令諸來求福者，免進葷血。凡正心誠意戒殺護生者，方與福利，助免災厄。汝神自身，便能仗此功德，深植解脫之因。又安士居士，每在途中，見牛犬禽鳥等，動必大聲呼曰，汝宜速發菩提心。菩提心一發，可以保證汝捷得出罪。汝今大苦惱，欲求脫此苦惱，汝須念不離佛，佛不離念，一刻勿忘失菩提心。閱者諸仁賢，當奉安士菩薩爲導師。如有不明因果律之酷烈者，對於安士菩薩之聖行，妄加腹非。或生譏誚。此乃招三途重苦之所由。宜切切開導而救護之。星宿與星宿聚而成星系統，是星之眷屬也。山脈與山脈聚而成山系統，是山之眷屬也。海水與海水聚而成海系統，是海之眷屬也。天衆與一切天衆成天眷屬。龍衆與一切龍衆成龍眷屬。六道四生，各以類聚，各各別成爲一眷屬。三千大千世界一佛所統治，而成一佛統治世界之眷屬。虛空無內外。心量亦如是。萬般一體看。何得分彼此。無常與本空。佛道善除苦。心平一切平。世界原無事。本無認有我。迷不知錯誤。無端生間隙。我見太無恥。一切成冤仇。安心招罪。